

四庫全書

經部

欽定四庫全書

經部
四書蒙引卷十四

詳校官給事中_臣戴璐

刑部郎中_臣許兆椿覆勘

總校官編修_臣倉聖脈

校對官中書_臣葉蘭

謄錄監生_臣左熙世

欽定四庫全書

四書蒙引卷十四

明 蔡清 撰

告子章句上

夏三條

孟子之論性善其辨甚力蓋此一字差則天下之事
皆廢矣堯舜之精一執中亦只是性善上事成湯云
惟皇上帝降衷于下民若有恒性即天命之謂性也
性善之說有自來矣此性既是善然後君師之道可
舉以賞善而罰惡抑邪而扶正而天下之事可從而

理矣若說性惡或性善惡混則世間凡不仁不義無父無君之事何所不可為哉此孟子所以諄諄於此正所謂為天地立心為生民立命也 黃氏日抄曰言性莫善於孟子孟子言性莫詳於此篇然為辨告子發也非無故而言也而繼之以人心得養失養之分齊王一暴十寒之喻究竟於舍生取義本心之真反覆乎宮室妻妾外誘之惑辨析乎養其小體大體之孰輕孰重無非歸之實踐履以全其在我者也性

學之說至本朝愈詳晦庵集其成今觀孟子之言性如此學者宜熟論而深思矣尚騰口說者何也

告子曰性猶杞柳也

章句九條減一百三字更定次序

告子意謂杞柳柯生之物耳初非有杞捲在也必由人以創造之而後成杞捲人性本自蚩蚩蠢蠢耳初非有所謂仁義也必由人以矯揉之而後有仁義性即仁義也今日性猶杞柳義猶杞捲則是認氣為性而性與仁義分矣豈所以論性哉 義猶杞捲也

依新安陳說義字上脫一仁字 以人性為仁義猶
以杞柳為栝櫨病在為字上子思曰率性之謂道未
聞以人性為仁義也 有是人即有是性仁義即性
也孩提之童無不知愛其親仁也及其長也無不知
敬其兄義也豈待矯揉造作哉 性者人生所稟之
天理也註明非人生所稟之氣也此即孟子告子論
性之所以不同者 杞柳栝柳註一物也有蒲柳有
楊柳有梅柳 朱子曰栝櫨似栝杉合子 栝杉即

今杉桮也杞柳為栝櫨者必是柳薄板自有可開板
之柳故獨曰杞柳也若今北方柳斗之類則用柳條
編成不似杉合子也 若卮匱之屬註小學註卮酒
器匱盛水漿之器 矯揉註矯者矯曲而使之直揉
者揉直而使之曲 以人性為仁義是以人性本無
仁義也故曰如荀子性惡之說也

如將戕賊杞柳而以為栝櫨止必子之言夫

芟一條

言杞柳之為栝櫨必有待於戕賊人之為仁義亦有

待於戕賊與蓋人性本善循其性而行之自無非仁義也若告子之言則人性必待戕賊而後得為仁義此說一行天下之人皆以仁義為害性而不肯為矣故曰率天下之人而禍仁義必子之言也

性猶湍水也章章八條減一百四字

告子之言以性無定體可善而可惡孟子之言以性有定體有善而無惡其曰人無有不善此章之要指也波流滌洄註波流之勢滌洄也謂水勢旋轉未

有所之也故曰決東則東決西則西 告子謂湍水
無分於東西在所決如何耳人性無分於善不善在
所習如何耳 強詞終難奪正理告子但曰決諸東
方則東流決諸西方則西流即此便見水之流下矣
蓋所決之方其地無不下者 人無有不善水無有
不下人皆以為又是一重意非也上文所謂人性之
善也猶水之就下也者正以其人無有不善水無有
不下耳水無有不下者自然之性也決之東西而東

西者人為有以導之也孟子所答去了湍字人無

有不善據本然之性言所謂順之而無不善順字因

下文反字意照出此句且莫用箇順字既曰人無

有不善而又曰今夫水

云

云者以天下自有惡者一

脚須着如此解破其性亦猶是也

題

人之可使為

不善如何說其性蓋言其性為人所逆亦猶水之為

搏擊所使也如此方說得乾淨性本善順之而無

不善者所謂情之正也本無惡反之而後為惡者所

謂情熾而動其性鑿矣程子之論所以論性兼論氣也

告子曰生之謂性章文二條減十七字末條出下題

生指人物之所以知覺運動者而言註蓋生則有知覺運動無知覺運動則死矣依大文講可且未露出人物字生之謂性告子此句是以生字貼性字欲性字有歸着也朱子曰生之謂氣生之理之謂性此句直剖斷得簡切雖孟子復生不復斯言矣愚

謂生之謂氣無不同也生之理之謂性則有不同矣
然要之人與物氣有不同性因有異 告子謂生之
謂性是混人物在其中而不及省夫人物之不同處
孟子一聞其說便覺人物自是不同如此說不得胸
中便自有犬之性猶牛之性牛之性猶人之性一段
說話了故先難之曰生之謂性也 云 云白與是依他
立說之本旨為辭故告子曰然繼之曰白羽之白 云
云白與告子於此若以為不然則不得謂生之謂性

矣若以為然則犬之性牛之性猶人之性矣故朱子
於猶白之謂白一條便註云則是謂凡有生者同是
一性矣即下文云也講本文不可於此處就依註
貼須要起得下文 白羽之白白雪之白白玉之白
以質言與犬之性牛之性人之性不必同而趙氏惠
以為羽性輕雪性消玉性堅者泥矣新安陳氏之說
自明白白羽至輕之白與白雪不堅之白白玉堅潤
之白質本不同

然則犬之性猶牛之性

芟五條減二十五字移一條入上題

犬之性猶牛之性此句只是牽過一步以起下句觀
大註一則曰犬牛與人二則曰仁義禮智之稟豈物
之所得而全哉皆不假區別犬牛之不同處可見然
其實萬物之性各自散殊此又在所當知 犬之性
守牛之性順犬牛之性各得其一偏 然則犬之性
猶牛之性牛之性猶人之性與此所謂性是孟子之
所謂性耶告子之所謂性耶曰是雖承告子之言其

實反告子之意蓋歸於孟子之所謂性也只看與字
可知明其不然也謂犬牛之性與人之性不同也既
不同則是孟子之所謂性無疑矣 饒氏曰人說孟
子論性不論氣若以此章觀之未嘗不論氣也若不
論氣何以說犬牛之性與人之性不同以氣為性至
今猶有此說董子云性者生之質也亦告子之意

知覺運動之蠢然者

註

蠢動也其字從春從虫

仁

義禮智之粹然者

註

亦在知覺運動之蠢然者上見

既曰知覺運動之蠢然者人與物同矣而孟子之
辯告子乃自知其說之非而不能對何與豈非人之
知覺運動上有所謂仁義禮智者在耶故曰形色天
性也雖告子之強辯亦不得以為與禽獸同矣此
章孟子只是且斷倒告子之說而未及告以己意然
意已在言表矣爭柰告子不察何或曰告子自知
其說之非宜亦知性善矣曰未也告子執拘其不得
於言終不肯求之於心故曰告子之辯屢屈而屢變

其說以求勝卒不聞其能自反而有所疑也使其能自反而有所疑思而得之則當如夷子之憮然為問曰命之矣而孟子之門人亦必記之以申性善之說矣蓋終是執迷不悟也

告子曰食色性也

章句三條減一百字

孟子開口便說仁義二者並舉而言欲學者兼致其力故告子言仁內義外見學者但當用力於仁而不必求合於義以矯孟子之說都是要與爭衡以主張

斯道之盟意思 味告子之意固不以義為性所有

亦非全以仁為性所有也蓋他認性在知覺運動上則性非全是心中物了性既認得差仁又認得粗夫仁者理也愛是情也他這說又以情為性是義外之說固非仁內之說亦未是 告子此說是言愛由心生故曰內若事物之宜則在彼故曰外語類亦以食色入仁義說仁愛之心生於內如甘乎食悅乎色亦是也事物之宜由乎外如所甘之食所悅之色亦是

也看大註一故字但不可局限如此說如下文所謂
吾弟則愛之長楚人之長都說得仁內義外意須活
看朱子曰告子先云仁義猶枯槁其意本皆以仁
義為外既得孟子說方畧認仁為在內亦不以仁為
性之所有但比義差在內耳
彼長而我長之非有長於我也

謂非先有箇長之心在我也明其在外也

白馬之白無以異於白人止之者義乎

芟二條減五十五字

言汝以白比長終是比不得更有一說汝以長者為義乎長之者為義乎據本文當有兩節意 告子以白喻長孟子承而答之以為白無不同長則有不同即其不同處便是心之制乃所謂義也義不在內乎且汝所謂彼長而我長之以為義在外不知汝是以長者為義乎以長之者為義乎如以長者為義則義可為在外若以長之者為義則義非外矣告子雖強辯亦安得而以長者為義乎此二句尤見孟子雄辯

之警策處若上文白馬白人不同長馬長人不同此亦是孟子道理到爛熟處應對之間自然左右逢原道理明暢也 我長之我以彼為長也我以彼為長則一而施於人馬則不同施於馬只是口頭而已施於人則有恭敬之心焉 告子以義為外全在事之宜上孟子以義為內重在心之制上所謂白馬白人不同長馬長人不同只見得心之制大抵告子彼長而我長之之言專指人至孟子方分人與馬來闢他

末句且謂長者義乎二句則是據告子所云者而轉以辨之似專指人言更以下文告子所謂長楚人之長亦長吾之長證之可見

吾弟則愛之秦人之弟則不愛也

芟一條末條出下題

告子曰吾弟則愛之秦人之弟則不愛也所主在我故有所擇也可見仁愛之心生於內長楚人之長亦長吾之長所主不在我惟長是視耳可見事物之宜由乎外 大註云愛主於我故仁在內敬主於長故

義在外我與長內外之分也

耆秦人之炙無以異於耆吾炙

減四字移半條入上題

長楚人之長亦長吾之長人固有然者耆秦人之炙
亦耆吾炙物亦有然者炙固在外矣然而耆炙亦有
外與炙在外而耆之則在內長在外而長之則在內
義不在外明矣此即上文長者義乎長之者義乎之
說尤見不必兼人馬之長說 究竟彼白而我白之
亦可見義之在內但告子不察孟子亦未暇與辯此

以就白上說意頗晦爾 義者事之宜以處得其宜者言非全據事言也若全據事言則義外矣故朱子於義人路也下云義者行事之宜加一行字尤見謹慎

孟季子問公都子曰何以謂義內也

減五十三字

當時告子之徒皆以為義外孟子之說專以為義內孟季子所見亦以為義外聞孟子之言而未達故私問於公都子曰人皆曰義外孟子獨曰義內以予觀

之亦若在外然不知孟子何以謂義內也

曰行吾敬故謂之內也

此即上章義不在彼之長而在我長之心之意蓋當時彼長而我長之之說公都子與季子皆熟聞之故公都子亦即就敬長一端以發孟子之意云

鄉人長於伯兄一歲

條芟二條減十六字更定次序

孟季子未達然亦善難意以敬雖在內然吾所以用其敬者則在外也故曰假如鄉人長於伯兄一歲則

誰敬曰敬兄酌則誰先曰先酌鄉人孟季子曰如此則吾不得而自主所敬在兄當酌之時所敬又在鄉人之長者惟視其在外者而轉移義果在外非在內矣此處公都子就可答之所敬在此所長在彼因時制宜不在我乎而義內之說明矣惜乎見未到此也鄉人長於伯兄一歲則誰敬蓋鄉人若不長於伯兄則敬伯兄固無疑若五年以長十年以長則其敬鄉人亦無疑曰敬兄言鄉人之長於吾兄者不多

不足以奪吾天倫之親之敬也 酌則誰先曰先酌

鄉人意謂鄉人外賓且少長也吾兄雖當敬然酌之際不可少讓乎蓋雖讓鄉人之酌而敬之在吾兄者終無損也 所敬在此庸敬也所長在彼亦斯須之敬也不可太泥敬與長之別故大註曰敬長之心云

公都子不能答以告孟子

減九十八字

公都子雖得孟子之大旨而未深得孟子之精意故不能答 孟子曰於答是也何有即可做其所難者

而反難之則因其辭以折之易矣汝其應之曰敬叔
父乎敬弟乎彼將曰敬叔父曰弟為尸則誰敬彼將
曰敬弟子曰惡在其敬叔父也彼將曰弟在尸位故
也子亦曰向者所謂先酌鄉人者亦以鄉人在賓客
之位故也庸敬在兄斯須之敬在鄉人因時制宜皆
由中出可以見義之果在內矣叔父之當敬於弟比
兄之當敬於鄉人之長者尤為分明故孟子復設此
難直是要得他在位故也一句出來而因以折之若

直尋季子之言而答以在位故也則恐其不服故假
辨而先發之然後以例釋之孟子若為大司寇極長
折獄

季子聞之曰敬叔父則敬

條減一百一字首條裁剪

此即上文所敬在此所長在彼之說公都子乃以所
易見者曉之曰冬日則飲湯夏日則飲水

云云公都

所答全是了但無孟子之警策亦其於道理未至精
熟地位耳敬叔父則敬敬弟則敬言敬由外生也

同一敬叔父則敬敬弟則敬也但季子所認則叔父與弟字重孟子公都子之說則敬字重敬出於我也大註此亦上章者炙之意皆因其所明而通之但上章是承食色言此章無所承然亦季子之所明者也須看孟子所以諄諄然力爭一箇義在內是甚意思蓋義外之說自性惡而來義果不在內則性惡不得為善矣人性須是仁義二者全具若有仁而無義則失了一邊道理非人心之理之全體也故范氏

曰二章皆反覆譬喻以曉當世使明仁義之在內則知人之性善而皆可以為堯舜矣

公都子曰告子曰性無善無不善也

章句一條

性無善無不善也謂不可以善惡名也如知覺運動善此知覺運動也惡亦此知覺運動也又如甘食悅色善人亦有之惡人亦有之安得謂專是善邪蓋以氣言因無善惡之分若以理言則人之性惟有善而無惡矣近世蘇氏胡氏之說註蘇氏謂堯舜以來

不得已而曰中曰一中謂不分上下也一謂未分二也胡文定曰性不可以善言才說善時便與惡對非本然之性矣孟子道性善只是贊嘆之辭以性善之善為贊美之辭則性字只渾淪一箇性無善亦無惡也胡五峯之說凡人之性粹然天地之心道義全具此似孟子之說矣而繼之曰無適無莫不可以是非分則又近於無善無不善之說蓋緣孟子論性不論氣欲附孟子而兼夫氣耳不知告子所謂氣又

非孔子之所謂氣質不同者性誠難認哉

以紂為兄之子且以為君

減十八字

微子啓王子比干題按此文則微子比干皆紂之叔父而書稱微子為商王元子疑此或有誤字註按王子字正如公子之類則比干為紂之親戚明矣家語曰比干紂諸父韓子性有三品之說註朱子曰此只說得氣不曾說得性又曰三品只說得氣稟然氣稟不齊或相十百千萬豈但三品而已哉蓋孔子四

等之說生而知之者上也學而知之者次也困而學之又其次也困而不學民斯為下矣是其中有可反之理蓋不妨於本性之善也今日上焉者善而已矣中焉者可導而上下也下焉者惡焉而已矣則是初生時便填定了人品無復學問之功無復克念作聖之理性無善無不善謂全不可以善惡名也性可以為善可以為不善謂性無善惡習而後有善惡也有性善有性不善謂有等從來是善有等從來是惡

三說俱以明不可專謂性善以碍孟子說也

乃若其情則可以為善矣

此以為字只如謂之相似與中庸不可以為道之以為字同蓋情是無意發出者不可謂情去為善也集註云本但可以為善而不可以為惡以為字俱當如此認乃若其情則可以為善矣言但見天下之人其情之發無有不善者則知人之性無有不善矣蓋性既善則無善無不善之說非矣性本但可以為善

則所謂可以為善可以為不善之說非矣人性既皆善則所謂有性善有性不善之說非矣則可以為善矣此善字說情乃所謂善也說性

若夫為不善非才之罪也

芟四條減一百七十七字

既曰乃若其情則可以為善矣乃所謂善也然人之為不善者又何也或者必以歸於才殊不知才出於性性既善則才亦善人之為不善乃物欲陷溺而然非其才之罪也為他剖析使不為性善之累才猶

材質人之能也註須看猶字如耳目有聰明之德手足有運動之妙時乎仁也而能兼愛時乎義也而能裁制時乎禮也而能敬讓時乎智也而能分別此皆所謂才也才其有不善者乎其有不善者用才者之罪也失其本然之才也或問情與才如何分曰性之發為情性之能為才以良能字來解才字最切

惻隱之心

一條芟一條減三十四字

惻隱之心人皆有之至是非之心智也此即上文乃

若其情則可以為善矣乃所謂善也然人多未得其
精意蓋曰惻隱曰羞惡曰恭敬曰是非此皆是好字
故曰乃若其情則可以為善矣若曰殘忍頑鈍驕慢
昏昧則皆是不好字是情不善矣其曰仁也義也禮
也智也亦一一至好字故曰乃所謂善也 惻隱
之心情也仁是性也此四句要說出因用以著其本
體意 不思不求註思以心言求以用力言思在前
有求則有思矣故上云不思而求之畢竟思求亦才

也不能盡其才者不思不求而擴充其善端也但不
可謂不能盡其思求之才當改云思求便是用其才
處 通章都是因情以著性

詩曰天生蒸民 一條芟二條減一百四十四字

有物有則就蒸民上說民之秉彝指則而言懿德亦
指則而言好是懿德者人之情也人情如是可謂善
矣情善則性亦善而其為不善者果非才之罪矣
引詩四句故好是懿德一句最重此句正是其情之

可以為善處緣此就見得人性之善也即上文之意
民之秉彛好是懿德題學的下第九板云問彛而
曰秉何也朱子曰渾然一理具于吾心不可移奪若
秉執然愚謂此說秉字似太着力大抵性是人元來
所挾帶的蓋人之所以為人者全在此如官之有文
憑然故曰秉彛如視遠惟明聽德惟聰此懿德也孰
不好是為父能慈為子能孝亦懿德也又孰不好是
孟子他日又曰心之所同然者理也義也理義即懿

德人心所同然即所謂人之情無不好是懿德者或專以為好他人有德者拘矣人心之天皎如日月是非好惡灼然自辨如食物在腹冷煖自知自然皆好懿德也 則也夷也懿德也好也自物而言用則字明非塊然一物也自民而言用夷字謂民之有常性也自人所好言用懿德字以其美而好之也各有攸當可見古人用字之不苟處蔡氏所註未切 程子曰性即理也註理是正理乃天地生物之心而人得

以生者也亦所謂天地之帥吾其性者也有何不善
故曰理則堯舜至於塗人一也但才稟於氣氣有清
濁稟其清者為賢則能以其才而盡其性稟其濁者
為愚則其才有未至而不能盡其性若學而知之是
曰有性焉而不謂之命則氣無清濁皆可至於善以
氣質之濁不能揜其本然之性也湯武身之是也

性即理也此句所以為有功於性理者緣前面自荀
子楊子至韓子胡子一向俱以氣為性而性之義不

白於天下者千有餘年 張子曰形而後有氣質之性者蓋繼之者善也是天命流行時未有形在也既賦形後則有氣質之性矣謂性安頓在氣質隨氣質之清濁而為等級也曰氣質之性便是對天地之性說天地之性純粹至善者也氣質之性內自有天地之性在矣畢竟性自是性氣質自是氣質不可與性混也 善反之則天地之性存焉 註謂始初天地之性雖為氣質所濁但經克治則初性復還矣 故氣

質之性君子有弗性者焉註弗性謂弗謂之性也

人之才固有昏明強弱之不同註昏明以知言強弱

以行言 不可無省察矯揉之功註首篇言矯揉謂

性本惡必矯揉乃可為善此章言矯揉謂氣質之性

有未善必矯揉乃可復於善其歸不同也

富歲子弟多賴章減一百五十八字更定次序

多賴多暴多字有斟酌富歲人家子弟未必盡能為

善凶歲人家子弟未必盡至為惡此二句重在下一

句故下文云非天之降才爾殊也云云於子弟而

一曰多賴一曰多暴殊也然一則曰富歲子弟一則

曰凶歲子弟則非天之降才爾殊所以陷溺其心者

然矣非天之降才爾殊也爾然也不曰降性降情

而獨曰才者就所為上為切此章正為性善而發

蓋孟子言性善雖公都子之徒不能無疑則後世之

信其說者寡矣故孟子於此反覆譬喻而極言之無

非欲使世人曉然無疑於性善之說而相率以入於

堯舜之道也以下數章皆同此意聖賢之畏天命也如此

今夫薺麥

薺一條減四十二字

今夫薺麥播種而耰之其地同樹之時又同勃然而生至於日至之時皆熟矣何嘗有不同雖其間不能無多寡之不同則以地有肥磽雨露之養人事之不齊也在薺麥豈有不同哉總見同類相似之意觀下文接云故凡同類者舉相似也可見所謂陷溺其心

之不同意皆在言外通一章看聖人與我同類而人心皆同然乎理義如此然則其所以不同者非以陷溺其心乎 麋麥猶言麋鹿鴻鴈麋鹿之大者鴻雁之大者麋大麥也一說麋麥只是一物未然 既曰播種而耰之其地同又曰則地有肥磽何與蓋同一地也特有肥磽異耳肥者地也磽者亦地也

故凡同類者

舉麋麥一物而見凡同類者之舉相似 同類與相

似不同同類以麤麥言舉相似如下文云云至皆熟矣

聖人與我同類者爰一條

直是言其性之無不同也應上文非天之降才爾殊也此比前章何以異於人哉堯舜與人同耳其意更顯今夫麤麥至聖人與我同類者是即物類之同以見人類之同故龍子曰以下至猶芻豢之悅我口是即人身之所同以見人心之所同如此則人性皆

善而可以為堯舜矣此孟子立言之意也

不知足而為屨止天下之足同也

減二十八字

此孟子承龍子之言而釋之而自此以下三條皆孟子之言也至故曰又非引古語 蕢草器也註即今之草包而小者論語有荷蕢而過孔氏之門者即此註亦云草器也

則天下何者皆從易牙之於味也

於字重看言易牙所調之味天下期於易牙言必以

易牙所調者為美也期與約同意亦必也

不知子都之姣者無目者也

子都古之美人也註不知何代人詩曰不見子都乃見狡童則子都春秋時人名矣

故理義之悅我心猶芻豢之悅我口

更定次序

二句可見人心之同然乎義理之實也此凡聖所同也理義之悅我心如他人所處合理吾固悅之如自已所處合理吾心亦自快愜是皆可見理義之悅

我心也此方是人心之所同然 在物為理見成者
也處物為義所裁制者也故曰體用之謂也此與道
義亦小異前章解云義者人心之裁制道者天理之自
然小註道是舉體統而言義是就此一事而言如君
臣敬之類義也其所以仁敬則道也所以仁敬者
出於天理之自然也

牛山之木嘗美矣章

是其日夜之所息

氣化流行未嘗間斷註人與物日夜皆有所生長也
故此章於兩節皆言之 日夜之所息人與物皆然
故六七十歲和尚亦須髭髮以此可見其良心亦然
又如竹筍之發日間所長不如夜間所長之多蓋日
間遇陽氣燥熱亦有旦晝枯亡之意不如夜間所長
之多也草木之旦氣獨盛

此豈山之性也哉

山以生物為性猶天地以生物為心此全是引起以

譬喻下文一節

雖存乎人者

二句

此句承上文言山之必有材此在山者然也雖然在人者亦豈無仁義之心哉

其所以放其良心者

所以放其良心者指物欲言物欲伐良心斧斤也

旦旦而伐之

芟二條減一百九十八字

旦旦指日間言與旦晝旦字同與旦氣旦字異其日

夜之所息平旦之氣此旦氣即夜氣所發者夜氣所
存即夜之所息者夜氣不足以存則旦氣遂不能清
而所謂幾希者亦滅矣 旦晝終有別旦早間晝通
日言然此旦又在平旦之後 梏之反覆專指旦晝
言言其梏而又梏日復日也

故苟得其養 一條減四字

山木人心其理一也辭俱平說意則重在人心大文
是如此集註亦是如此辭所以必兼平說者以無物

二字明也

孔子曰操則存舍則亡

芟四條減一百三十五字

操則存

云

文勢上虛下實正如求則得之舍則失

之是求有益於得也求在我者也

操則存舍則亡

其存其亡只係乎操舍之間忽然而出又或忽然而

入惟所操舍耳在心之出入豈有定時哉出則在外

入則在內亦惟所操舍耳在心豈有箇定處莫知其

鄉與出入無時自是不同予故於出入字下兩箇忽

然以貼無時之意 大註云以明心之神明不測要
看以明二字 神明不測兼得失言 惟其得失之
易故保守之難也 程子曰心豈有出入亦以操舍
而言耳如此則莫知其鄉亦須從操舍上說

孟子曰無或乎王之不智也

一章隻一條減四十四字

無惑乎王之不智也言其不智有由也 暴之陽氣
之發舒也故生寒之陰氣之閉固也故不生 奕之
為數題數技也

使奕秋誨二人奕

使是設使非實事也

為是其智弗若與曰非然也

減一百二十九字

上段不智直就王說此是承上文一心以為有鴻鵠
將至者說來語末乃見王之不智處 此章之旨謂
無恠乎王之不智也蓋君子踈而小人親也使其能
專心致志於君子則君子日親養之以善而智矣今
也不然故小人養之以惡則愚無怪乎其不智也二

節一貫意故引程子范氏之言於後貫兩節意也

孟子之於齊王進見時少無以勝衆邪之交蔽蓋由齊王之於孟子聽信不專而有以分其心於多岐也孟子如奕秋誨齊王以奕王一心以鴻鵠將至而不能惟奕秋之為聽此即所謂吾見亦罕矣吾退而寒之者至矣故曰無惑王之不智也孟子此章雖有前後二譬然只是一齊王也所謂天下易生之物而一暴十寒者齊王也所謂奕秋之所誨其一人雖聽之

一心以為鴻鵠將至思援弓繳而射之者亦此齊王也同是論王之所以不智 涵養氣質薰陶德性註氣質與德性不同氣質謂剛柔緩急之氣涵養之使其中和不偏德性謂仁義禮智之性薰陶之使與聖賢同歸也 告子一篇全是發明性善之言就如王之不智一章亦是此意如云為是其智弗若與曰非然也便是非天之降才爾殊也

魚我所欲也章

自魚我所欲至賢者能勿喪耳是說羞惡之心人皆有之此本心也人人所同也自一簞食一節正謂人皆有之至末則是說衆人之所以喪其本心也此章亦見得人性皆善其不善者乃陷溺其心而然也

所謂二者不可得兼固不止謂簞食豆羹得失死生之際但新安以為是說託孤寄命之大節時事則亦似有未盡者如孟子答滕文公以效死勿去子思之守死於衛民生於三惟其所在則致死之類是皆死

生取舍所在也 凡古人殺身成仁奇偉俊絕等事亦皆只是性分內所當然者而已所謂秉彝義理之良心也故此章舍生取義處不必說是賢能如此且說箇義理之心人所同然者如此故一簞食一豆羹條註云是其羞惡之本心欲惡有甚於生死者人皆有之也

生亦我所欲所欲有甚於生者

所欲有甚於生者即是義所惡有甚於死者即是不

義大註云欲生惡死者雖衆人利害之常情此衆人雖聖人亦在其中又曰欲惡有甚於生死者乃秉彛義理之良心此亦通衆人而言故不以賢者及君子等對上文衆人字也下文衆人字則對賢字說矣但曰賢者能勿喪耳便見衆人喪之

一簞食一豆羹

蹴爾尤重於噓爾故乞人亦不受 噓爾而與之新安陳曰如齊餓者不受嗟來之食之類檀弓曰齊大

饑黔敖為食於路以待餓者而食之有餓者蒙袂輯屨貿貿然來黔敖左奉食右執飲曰嗟來食揚其目而視之曰予惟不食嗟來之食以至於斯也從而謝焉終不食而死曾子聞之曰微與其嗟也可去其謝也可食嗟來之食其人不受而死曾子曰微與其嗟也可去其謝也可食故孟子云其下朝不食夕不食飢餓不能出門戶君聞之曰云周之亦可受也免死而已矣此意得禮義之中時措之宜乃孟子所

傳於子思而子思得之曾子者也可以見孔氏之家
法不為已甚也

萬鍾則不辨禮義而受之

芟一條

以所識窮乏者得我併為宮室之美妻妾之奉者言
之可見聖賢之精於義 總註云此章言羞惡之心
人所同有是釋前五節之義或能決死生於危迫之
際而不免計豐約於宴安之時則釋後三節意也
牛山之木章是存養之功魚我所欲章是取舍之分

此章總註最要看得好危迫之際尚可能忍宴安之時乃就利焉可見省察之功不可頃刻而或忘也

孟子曰仁人心也義人路也

故反而名之曰人心註蓋仁本是心之德也所謂心如穀種仁則其生之性是也今乃曰仁人心也乃是反而名之謂反歸諸心者也小人亦有心今日仁人心也指其心體之本然者

學問之道無他

芟三條減三十四字

學問之事固非一端如博學之審問之慎思之明辨之篤行之皆是也此學問兼知行與中庸道問學同味無他字見得非是先求放心只是其道在求放心也集註自明人或誤看耳至引程子曰聖賢千言萬語云下學而上達也則益明矣或疑朱子曰益能如是則志氣清明云似有先求放心之意非也蓋學問以求放心下學也義理昭著則說向上達非謂求放心而後可學問也其曰學問之事固非一

端者事字對道字非一端字貼無他及對而已矣字

孟子曰今有無名之指

芟一條減四十八字

無名指手之第四指也

註

非人所緊要者

指有五

一巨指二食指三將指四無名五小指蓋巨大也食

指者人之所食以此指為力也楚人獻黿於鄭子公

之食指動曰他日我如此必嘗異味將指者言其將

領諸指也左傳吳王闔廬傷將指無名者以其不切

於用疑於無其實故謂之無名指與未有所考不

遠秦楚之路題孟子魯人也在齊亦最久自齊魯而
視秦楚則為遠耳非謂自秦至楚自楚至秦也對
桐梓言之則曰身自身言之則有心指之分隨所在
分輕重使人知所重也下三章只是此一意重出

孟子曰拱把之桐梓

舊條芟此條出下題

拱把之桐梓只言微小之意以明身之為重也人苟
欲生之只是養令生活之意

豈愛身不若桐梓哉

移一條入上題減八字

身以心為主與上下章意同觀下章言人之於身也
兼所愛而曰無以小害大可見但此對桐梓言故只
曰至於身而不知所以養之所以養之者治其心而
已

體有貴賤有大小

賤而小者口腹也貴而大者心志也 看來賤而小
者耳目手足之類皆是朱子專以口腹為小體者因
孟子下文專言飲食之人養小失大而云耳學者要

當推類以及其餘孟子要只是舉其一端在人所易
曉者

今有場師舍其梧櫨減二十九字

梧櫨即桐梓也故集註云梧桐也櫨梓也皆美材也
梧櫨二木名櫨棘小棗一物也詩凱風吹彼棘心傳
曰棘小木叢生多刺難長故曰非美材也

養其一指而失其肩背而不知也

養其一指而失其肩背只是取譬之辭孟子非實以

肩背為大者所在也此章總重在心志故以為失肩背之喻亦謂不能顧其大者耳 今有場師至則為狼疾人也正是養其小者為小人意但未可說出至下文飲食之人則人賤之矣為其養小以失大也方說出上文且譬以起之正如不揣其本而齊其末金重於羽二條起取色之重者一條 孟子此數章譬策人尤切至曰有放心而不知求哀哉曰心不若人則不知惡此之謂不知類也曰弗思甚也曰養其一

指而失其肩背而不知也

公都子曰鈞是人也

章莖三條減二十九字

孟子之學惟於思之一字着力最深故每以此覺人
一則曰弗思耳二則曰弗思甚也又曰求則得之舍
則失之求亦思也至於所引誠之者人之道也亦改
誠之為思誠其喫緊之意可見誠以人之所以為人
者心焉而已矣心之官則思思曰睿睿作聖又曰思
者聖功之本思之於人大矣 語類鈞是人也章云

先立乎其大者則其小者不能奪也此語最有力且
看他下一箇立字昔汪尚書問焦先生為學之道焦
只道一句先立乎其大者 茫茫堪輿註以為堪者
天道輿者地道正韻註曰龕與戡同又曰龕浮屠塔
下室愚意所謂堪者對輿而言當是此意但不知出
於何書 以堪為天道恐謂於物無不覆也輿者易
大傳坤為輿

孟子曰有天爵者有人爵者章

仁義兼舉體用道理已盡了忠信則仁義之發於心而見於事者無一之不實樂善不倦則仁義之實者又無一息之間斷謂之天爵者非人所得而貴賤者也仁義可欲之謂善也忠信有諸已之謂信也樂善不倦充實之謂美充實而有光輝之謂大雖大而化之之聖亦樂善而不倦者也故樂斯二者樂則生矣生則惡可已也惡可已則不知手之舞之足之蹈之亦樂善不倦者也註曰天爵者德義可尊自然

之貴也如此方得爵字出如良貴也要說飽乎仁義
令聞廣譽施於身方得貴字意思出

終亦必亡而已矣

與仁之勝不仁章俱是說自家

孟子曰欲貴者人之同心也

貴之一字以所崇重而得名也但所崇重者皆謂之
貴如爵祿固在所崇重如仁義尤在所崇重也故曰
人人有貴於己者欲貴者人之同心也在位之貴

也即人爵也人人有貴於己者在內之貴也即天爵也良貴良者本然之善也指所性之貴也

人人有貴於己者弗思耳

不必兼言其拘於氣稟也只可說是蔽於物欲而弗思蓋孟子言性善不論氣質也

詩云既醉以酒既飽以德

減三十字

大雅既醉首章曰既醉以酒既飽以德君子萬年介爾景福此父兄所以答行葦之詩言享其飲食思惠

之厚而願其受福如此也 愚按詩德字指恩惠蓋
主人之德也今日飽乎仁義所以不願人之膏粱之
味也則是在我之德也非指出於主人者斯亦斷章
取義而義不同也

所以不願人之膏粱之味也

不願謂無所慕於彼也非謂有厭薄不願就之意

孟子曰仁之勝不仁也猶水勝火

芟一條

仁之勝不仁也猶水勝火今之為仁者猶以一杯水

救一車薪之火也及其不熄則人從而謂之水不勝火正由我之為仁不力故爾是我之所為有以深助於不仁者也以吾觀之此人之心亦且厭倦怠棄并與其所為杯水之仁而亡之矣如此說方與總註言為仁不至而不反求諸己者合也 仁不仁以二人言非以事言孟子此為當時之君言梁惠王以能行小惠而訝其民之不加多於隣國是正所謂不熄則謂之水不勝火者也 集註兩人字不同而人遂以

為真不能勝此人字對下文我字即下節所謂此人者也

孟子曰五穀者種之美者也

但曰五穀者種之美者也苟為不熟不如莠稗便見美種之不及熟為可恨而非有慕於莠稗也故曰夫仁亦在乎熟之而已矣仁而不熟反不如他道之有成然則為仁者可不務至於熟哉大註是以為仁必貴乎熟而不可徒恃其種之美此意似尤重人多

專主此而不欲該下句而不知孟子必曰夫仁亦在乎熟之而已矣必令人專熟仁者何意豈非又不可以仁之難熟而甘為他道之有成 朱子一日舉孟子五穀者種之美者也苟為不熟不如萑稗誨諸生曰和尚問話只是一言兩句萑稗之熟者也儒者明經若通徹了不用費辭亦一言兩句其理便明否則却是五穀不熟不如萑稗

告子章句下

任人有問屋廬子曰

芟一條減七字

任人有問屋廬子其曰有者任國之人固多記者不
得其姓名故云

以禮食則飢而死不以禮食則得食

芟三條

不以禮食則得食謂如其嗟也可去其謝也可食之
類未至如終兄之臂之甚也不親迎則得妻謂其家
貧不能舉六禮之類未至踰東家牆而樓其處子之
甚者也 曰以禮食則飢而死不以禮食則得食必

以禮乎親迎則得妻不親迎則不得妻必親迎乎此
所謂取食色之重者與禮之輕者而比之奚翅食色
重者其不揣其本金重於羽兩節正是喻此意思
禮食親迎禮之輕者也註此本不為輕但以對飢而
死以滅其性不得妻而廢人倫則為輕耳
不揣其本而齊其末

不揣其本而齊其末二句且虛說言不取下齊而徒
取上齊則寸木可高於岑樓矣喻不以禮與食色輕

重之大分較之而但以食色之重者與禮之輕者比則食色固可重於禮矣下條金重於羽亦是此意

岑樓題岑山之高銳處也故註云岑樓樓之高銳似山者

金重於羽者

減三十七字

此金字五金之總名想帶鉤有以白金為者有以黃金為者又有以赤金為者赤金銅也

豈謂一鉤金與一與羽之謂哉

芟二條減五十三字

鉤帶鉤也註古人束帶其帶有鉤左傳子糾之爭管仲將兵遮莒道射中小白帶鉤帶鉤以金為之其金最不多不揣其本金重於羽兩喻總是一意如今有場師舍其梧櫟下文云養其一指而失其肩背而不知也豈不是兩喻一意

往應之曰終兄之臂而奪之食

芟四條減一百十六字

往應之曰以禮食則飢而死食之重固然矣然必終兄之臂而奪之食則得食則所犯於禮者亦大矣則

將紵之乎蓋寧飢而死不可奪兄之食以苟生也親
迎則不得妻色之重固然矣然必摟東家之處子乃
得妻則所犯於禮者又重矣則將摟之乎蓋寧不得
妻而不可摟人之處子也故曰禮與食色皆其重者
蓋如此則依然是禮重而食色輕信如屋廬子之說
矣孟子之言所以伸屋廬子之說也 或曰以禮食
則飢而死一條何以見是食色之重者與禮之輕者
曰只看死字及不得妻字死生所係此見是舉食之

重者不得妻而廢人倫絕後嗣此見是舉色之重者
禮則指平常禮任人此問只重在死字及不得妻字
上不曾思終兄臂與摟處子之犯大節處故孟子出
此一頭與之平稱便見得禮終是重矣甚矣孟子之
善於辨折自非精義入神之學安得立談俄頃之間
有此議論刈斷 義理事物其輕重固有大分註義
理禮也事物食色也其輕重固有大分者禮重而食
色輕也 然於其中又各自有輕重之別註由任人

所難則禮輕而食色重矣由孟子所論則禮重而食色輕終有不可易者矣 錯綜斟酌 註錯者交而互之一左一右之謂也即經也就此章言則輕重自有大分者也綜者總而挈之一低一昂之謂也即緯也就此章言則或食色重而禮輕或禮重而食色輕也固不肯枉尺而直尋者輕重之不越其大分者也亦未嘗膠柱而調瑟者所重固在乎禮亦有時乎殺禮以就食色也 食色與禮孰重一章可見孟子精義

之工夫制事之權衡非惟正大之理痛快人心而其雋永之味咀嚼無窮此等議論所謂中庸其至矣乎雖聖人復起不易其言矣欲得議論之當文章之妙者宜熟玩也

曹文問曰人皆可以為堯舜有諸芟二條

此章要細看數箇為字人皆可以為堯舜孟子曰然以其有此理也交曰云則失其所以可為堯舜之旨矣且此言亦似有自挾其狀貌之類於湯文意

今交九尺四寸以長謂九尺四寸仍又長些此與云
百里而遠百里而近之類同

曰奚有於是亦為之而已矣

減十四字

人皆可以為堯舜本不論形體故孟子曰奚有於是
抑之也亦為之而已矣此句最重謂為其所為也

有人於此力不能勝

云

有力人矣

芟二條

然則舉烏獲之任

補

然則二字也要看與上文意連

處蓋所以為無力人者在於不勝匹雛所以為有力

人者在於能舉百鈞則所以為烏獲者亦在於能舉
烏獲之任是皆不在於形體也此章盡是譬論至夫
人豈以不勝為患哉弗為耳則正言人皆可以為堯
舜意則為無力人則為有力人是亦為烏獲此三
為字輕與下文是堯而已矣是字同看若人皆可以
為堯舜為字內却有道理

夫人豈以不勝為患哉

芟二條減一百三十五字

曹文曰食粟而已如何則可是固以不勝為患也

有人於此一段諄諄於匹雛百鈞及烏獲之任等語者見得所以為堯舜者在於為堯舜之事也即下文服堯之服誦堯之言行堯之行也徐行後長者謂之弟正所謂夫人豈以不勝為患哉弗為耳故又曰夫徐行者豈人所不能哉所不為也堯舜之道孝弟而已矣孟子直要說得為堯舜之容易處今或眩於堯舜人倫之至及堯舜之道大矣之詞則反惑矣原陳楊二氏之說亦本是發其所以容易者耳不必依

輔氏解說 專以徐行疾行為言分明是為曹交有
此失而發而繼之曰堯舜之道孝弟而已矣此語近
而遠也

子服堯之服止桀而已矣

減二十六字

此正所謂奚有於是亦為之而已矣者言能為堯舜
之事則為堯舜矣不能行其事則雖有湯文之體貌
何足道哉陽虎固類孔子矣而不免為庶人 子服
堯之服三句都須就孝弟說但上節言徐行後節又

言服與言行者以其禮貌衣冠言動云理故及之也徐行後長者一節言為堯舜之易子服堯之服一節言為之在我也

曰交得見於鄒君

減六十八字

見於鄒君而曰得假館而曰可以受業而曰願留其詞皆近倨而鄙陋不但假館而後受業為見其求道之不篤也味交此語有挾貴求安之意交得見於鄒君時孟子居鄒曹交以事過鄒願留者曹交自願

留身於鄒也孟子原是鄒人

曰夫道若大路然豈難知哉

芟十條減五十字

夫道若大路然如父當慈子當孝兄當友弟當恭之類此理昭然智愚所共曉者故曰豈難知哉此正指衆人所可與知者耳若夫精微之蘊則亦有未易知者孟子與曹交言則如此夫道若大路然所該亦自廣則所謂歸而求之有餘師者亦豈止孝弟哉而曰歸而求之事親敬長之間者謂歸就親長對留此

而受業於師言也其曰性分之内萬理皆備隨處發見無不可師亦可見矣隨處發見無不可師註只言依他行便都是道也中庸所謂率性之謂道亦此意也曹交事長之禮既不至於前數節見得求道之心又不篤於後兩節見得

公孫丑問曰高子曰小弁小人之詩也

雙一條

小人之詩非君子之詩也曰怨殊無溫柔和厚之意小弁之詩其畧曰何辜于天我罪伊何心之憂矣

云如之何又曰君子秉心維其忍矣君子不惠不舒
究之分明是怨其親如曰天之生我我辰安在亦自
怨也但不必說怨親亦不必說怨已所謂怨者正註
所謂哀痛迫切之情也

曰固哉高叟之為詩也

芟五條

有人於此越人闕弓而射之此之字正指有人於此
之人也無他戚之也故涕泣而道之不使其妄殺
人而罹于罪也小弁固怨矣然小弁之怨親親之

情也夫親親者仁也仁者君子之道也而高子乃以
為小人之詩高子之為詩如此亦固矣夫

凱風親之過小者也

減五字

凱風只可說自責不可說怨便是怨不謂怨親也

七子之母過在身家宜白之父過係宗社七子之母
所失者不自制其一己情慾之私而宜白之父所失
者三綱淪九法斁而四海覆矣此其過之小大可見
七子之母雖曰過係身家然大節已墜亦難以語

人道者矣如有國者有此婦人亦能使三綱淪九法
斃而四海覆也晉賈氏唐武韋楊之屬是已即褒姒
亦是已

親之過小而不怨是不可磯也

芟一條

不可磯謂水不可容磯也 磯水激石也不可磯言

微激之而遽怒也 註問激者水激之也怒者水乎石

乎曰非石怒乃水怒也水激石謂水所見激之石也

實石激水而致怒也故小註謂水中不容一激石後

世所謂鈞礪是也礪即是石但水中或水涯石乃謂之礪既云親之過大而不怨是愈疏也則其怨以親之過大矣以親之過大而怨安得為全不怨親故孟子之意自出於至公至正而後人乃以朱子詩傳之言而過為褒飾何哉愈疏不孝也小弁之所以怨也不可礪亦不孝也凱風之所以不怨也雖均之為親之過然過有大小而怨與不怨各有攸當焉此孟子之所以善為詩也小弁之所以怨者以其不

忘乎親也昔劉琦所處與宜臼略同因從諸葛孔明
登樓去其梯而問計孔明教之曰申生在內而亾重
耳在外而伯錡遂出外此則為忘其親而不怨矣但
凡人情處親戚朋友間有不合如速性丟撇不以介
懷者則薄矣安得以其不怨而取之哉孔明之為錡
謀於智識則極高矣若揆以聖賢之術似當復有所
言而止於此此則孔明之學也 上節以越人關弓
與其兄關弓分兩意則小弁之怨其兄關弓之類也

此節愈疏與不可磯亦分兩意一屬小弁一屬凱風
而上節越人闕弓者將無所屬只是以對其兄闕弓
言此下有凱風何以不怨之問乃云

舜其至孝矣五十而慕

芟六條

五十而慕此解作怨慕亦借解耳其實舜三十登庸
已不格姦而允若矣何至五十猶有怨乎其怨乃在
往于田之日也 五十而慕還作不得於親說與萬
章篇首意不同矣舜之所以為至孝者正以其怨慕

則小弁之怨未為不孝若論所由則舜之怨怨已之
不得乎親小弁之怨怨親之不容乎已未免為不同
也 註周幽王娶申后生太子宜臼又得云為作

此詩至詩經則註曰幽王取於申后生太子宜臼又
得褒姒而惑之生子伯服信其讒黜申后逐宜臼而
宜臼作此以自怨也序以為太子之傳述太子之情
以為是詩不知何所據也 按朱子於二書註一謂
此詩作於太子之傳一謂出於太子自作其不同如

此所當知也 趙氏曰生之膝下一體云下二句
皆指既生以後說所以申一體而分之意新安陳氏
以為此由子生之始而推其未生之前者非也

宋惲將之楚

章減十五字

我將言其不利也似亦未為甚違於理孟子却力沮
之者欲其因是行而開二王以仁義之道庶幾乎生
民之福遠大之業也故即其利之一字而究論之如
此當時以為迂濶者也 三軍之師就在上人說言

其將也三軍之士就在下人說言三軍中人也
有位者有無位者自將校以至卒伍皆士也
下文為人臣者為人子者為人弟者皆三軍之士也
為人

臣懷仁義以事其君

云

如此則君有正臣父有孝

子兄有賢弟四境之內同一尊君親上之誠舉國之
人同一愛親敬兄之願人心既振國勢自張然而不
王者未之有也
總註曰此章言休兵息民為事則
一然其心

云

明辨之也由宋掙之說則秦楚構兵

都不論是非不論得失只是無利便不為推是心以
徃當惟利之求矣寧不至於亡由孟子之論則天下
只有箇仁義是當為者如秦楚構兵要非仁義之舉
若以仁義說之吾言一入則彼之兵自息亦足以活
許多生人之命且使彼惟知仁義之為美而務之由
是仁必愛親義必敬君然而不王者未之有也雖不
求利利在其中矣此章與首篇首章同一機軸

孟子居鄒季任為任處守章

孟子居鄒處於平陸居處二字少有別居意常處意
暫蓋鄒是父母之國平陸其所寓也季任為任處
守處對出而言蓋君出而為君守位者不出故曰處
守

受之而不報

不報者不往答拜也

連得間矣

謂已得間而問也非謂孟子所處有間隙處也故大

註云知孟子處此必有義理

書曰享多儀

芟四條減一百二字

書曰享多儀儀不及物曰不享惟不役志于享此數句皆書詞出洛誥周公告成王以御諸侯之道也但書所享指天子孟子引之則謂享賢者事也儀禮意也對物言禮有本有文此禮字蓋指本言享多儀謂享上主在多儀必先有享上之禮意然後用物以將之方成享也今也儀不及物則物雖備而誠不

至惟不役志于享故曰不享既不役志于享則所謂
享者特其名耳實則不成享也此分明是說儲子得
之平陸而但以幣交也惟屋廬子便解得看來屋廬
子樂正子都聰明 為其不成享也一句最當玩味
要見是發上文未發之意莫與上文不享一般看要
深一步正是解那意

屋廬子悅或問之芟一條減三十七字

屋廬子悅已得孟子之意矣或問之雖聞其言未得

其意也故問之猶魯子曰唯門人問曰何謂也 儲

子為齊相可以至齊之境内

註平陸去齊國都必密

邇若隔信宿似亦不可綰相印於外邑也故曰儲子

得之平陸可知其密邇也 通章題目分截當一頭

兩脚孟子居鄒至受之不報一截他日由鄒至為其

不成享也一截屋廬子悅至末一截仲珠正如此說

先名實者為人也 一章

名實二字要做一類看不必謂名者實之賓實者名

之主大註自分曉曰名聲譽也實事功也大凡仕進
的人所圖便在此二者 為人似可兼正君救民而
朱子於此獨言救民大抵必正君而能救民也 夫
子在三卿之中則是志在為人而非自為者矣今乃
名實未加於上下而去之既不成為人亦不成自為
仁者固如是乎 夫子在三卿之中大國三卿是時
齊雖僭號稱王卿猶仍舊按周禮天子六卿

居下位不以賢事不肖者伯夷也

條

此條是反髡所問意蓋髡所問意言不為人則自為孟子舉此二子言伯夷不屑於就者也柳下惠不屑於去者也伊尹則有去亦有就者也去者是仁不去者亦是仁安得拘以為人與自為顧其所存所處何如耳居下位不以賢事不肖者伯夷也此下位不指有官者謂士庶也伯夷當紂之時居北海之濱以待天下之清故云此伯夷之無私心而合天理也天下有道則見無道則隱伯夷何心哉理亦宜然也

五就湯五就桀者伊尹也尹何以見其仁尹之始就湯應聘而來欲以斯道覺斯民也及湯進之於桀又欲以所以事湯事桀也至於數往返而桀不可化乃相湯奉天命以伐桀而救民也豈為利哉是其心亦公而於理無違矣 不惡汚君不辭小官者柳下惠也何以見其仁惠嘗曰爾為爾我為我爾焉能挽我哉又孟子曰柳下惠不以三公易其介惠之制行如此心豈有私哉理豈有悖哉亦可見其仁也 君子

亦仁而已矣說開去不指三子孟子自謂也以為承
三子言則可曰三子者不同道亦見得伯夷為後名
實一等人伊尹柳下惠合為先名實一等人矣但孟
子所反髡意重在夫子在三卿之中至仁者固如是
乎數言何必同一句最重總是無私心而當理固皆
仁之所在也 仁者無私心而合天理之謂註與論
語當理而無私心則仁矣是皆以心言就事上論心也
故曰其趨一也不必以無私心為心當理為事主心

而言事亦在其中矣

公儀子為政

為政者相國之任為臣則凡布列庶位者皆是如
云齊桓公任管仲為政子產聽鄭國之政可見

華周杞梁之妻

華周杞梁事見左傳所謂杞殖者即杞梁也所謂華
還即華周也二人皆齊大夫也所謂莒子重賂之使
無死謂使無出力而死戰也吳氏程按左傳禮記皆

無華周妻哭之事不過帶說華周猶前稱禹稷過門不入耳

有諸內必形止無其功者

二句一類事者已之所為功者人之所歸謂功名也
孔子為魯司寇

膳肉膳孟子作燔註作肉之炙燔者詩膳炙芬芬

不脫冕而行言急也蓋冕非行旅服也史記作孔子
遂行得其意

乃孔子則欲止苟去芟九條減二十字

二句不可指作一意看大註又字微罪屬孔子或以屬君相者非也或曰如此則大註何以云不欲顯其君相之失曰正合也蓋孔子不以微罪自居則其失在君相矣汪氏註未安孔子以腩肉不至而行其用意欲人咎其以細故去國在孔子有微罪也非謂以君相之微罪而行也此所以為不顯君相之失以為用意忠厚也然雖細故亦其故也故又曰不欲為

無故而苟去 欲以微罪行使人咎其可以無去而
必去也不欲為苟去在已亦有辭於去非全無可去
之故也 君子之所為至不識也當依上文君子亦
仁而已矣例其大註云蓋聖人於父母之國至用意
忠厚如此固非衆人所能識也此數句都附在大文
不欲為苟去二句而起下文二句意 見幾明決自
桓子受女樂時已決於去矣用意忠厚則且遲之托
以腍肉不至而去也論語曰齊人歸女樂季桓子受

之三日不朝孔子行則紀其實也可見其見幾明決矣

孟子曰五霸者三王之罪人也

芟十一條減十六字

自天子適諸侯曰巡狩至助不給是一節省耕省歛
天子諸侯之所同也自入其疆至有讓是一節言天
子巡狩之事自一不朝至六師移之言諸侯述職之
事以上文觀之則賞罰征討之柄皆自天子出固無
有撓諸侯以伐諸侯之事者也故繼之曰是故天子
討而不伐云云而繳云云故曰五霸者三王之罪人也

是故二字分明承上 自天子適諸侯曰巡狩至六
師移之皆舉先王之法而承之以是故天子討而不
伐至伐諸侯者也以見當時諸侯之違王法不止擯
諸侯以伐諸侯一事但即此一節明其無王而上文
所舉先王之法皆在所違中矣詞簡而意該不可不
知也 土地辟無閒曠之地也田野治無荒蕪之田
也 養老者無凍餒之老也尊賢者知重有德也俊
傑在位者收用人才而不取培尅之徒也此一句專

指布列庶位以修百職者不與尊賢相混 慶以地
或曰三王之世九州之內自先王建邦分土時便已
星羅棋布本無閒地則當如何曰割土地荒蕪遺老
失賢者之地以賞之曰三王之世命討素行威令素
舉其四隣皆無有土地荒蕪者則又當何如曰孟子
不云乎此其大略也 獨言土地荒蕪則田野不治
蕪之矣遺老者棄老者而使失其養也失賢者不見
用所謂考槃在澗白駒空谷或居東海之濱或居北

海之濱也。扈卨在位者，畜聚歛之臣也。遺老失賢，
扈卨在位則有讓王者，亦訪察不然，初入其疆亦難
辨其扈卨與俊傑也。則有讓不言所讓者，何事豈
以上文有慶以地在而意自可推耶？貶其爵公，貶
為侯，侯降為伯也。削其地，又是一節。公侯皆方百
里，伯七十里，始封時制也。六師移之，註既曰誅其
人而變置之，則非滅其國矣。是故天子討而不伐，
諸侯伐而不討。討者，端拱穆清之上，但出令以討罪。

人也伐者奉一人之命舉三軍之師往取罪以復於上也若接諸侯以伐諸侯則何所出令何所承命但以形勢驅率隣國而為之辭以就其私而已方伯連帥註蓋只是一人平時為方伯征討則稱連帥也蓋古者兵民為一凡公卿大夫士當征伐時則皆稱軍師卒旅之長五霸之伐諸侯而必接諸侯以伐之者此正假仁處也以其不奉天子之命亦須合諸侯之議併諸侯之力而以為出於公也天子則命方

伯連帥伐其罪五霸則摟諸侯以攻伐實違其法而猶竊其法雖竊其法而壞其法也 自天子適諸侯至六師移之皆舉三王之法就見得五伯之違王法也便見得五伯為三王罪人不必依陳氏謂使居三王之世方為罪人

五霸桓公為盛條

五霸桓公為盛依此則丁氏所謂夏崑吾商大彭周豕韋者雖不錄可也 束牲陳牲不殺也既殺則有

血在不容不軟故朱子知其為不殺也 印本作讀
書加於牲上讀字差一本作櫃字為是矣作匱字亦
誤 葵丘之會諸侯為一句非諸侯束牲載書而不
軟血也謂桓公也雖諸侯同盟主之者桓公則束牲
載書非桓公意而何束牲者束縛之於壇上既不殺
則不容不束縛 誅不孝蓋為當時諸侯有溺愛而
不知其子之惡者故云 無易樹子無以妾為妻亦
為當時有此事下皆倣此 無易樹子世子之樹也

上則已為天子之所命下則已為國人之所戴故不
易也然萬一有罪亦不容不易故先之以誅不孝二
義自可相徵也 無以妾為妻妻所取以配身敵體
而上承家廟者也妾庶安可以尸之如此不惟輕其
身且輕先君矣 尊賢育才以彰有德賢者尊之是
致其隆也才者則育之以為用耳此均是彰有德
俊傑在位便是育亦不必說如今學校育才 士無
世官恐非才也官事無攝恐廢事也 取士必得取

之則以為官矣世祿者亦在所取 無專殺大夫必
自天子出也與下文無有封而不告同意若士以下
自己出矣蓋天命天討惟以付之天子而他無所預
也 壅泉激水是兩事壅者以自利於己激者以嫁
患於人泉者其源也水者其流也專其利於己則必
有病於人嫁其病於人則亦為利於己大註專小利
病隣國兩端盡之矣 言歸于好言蓋語辭如詩經
言旋薄言之類 言歸于好不得違五命之禁也新

安解作無構怨也恐不切且接下今之諸侯皆犯此
五禁不來葵丘五命非桓公所自為一明天子之禁也
長君之惡其罪小

長君之惡者未必皆逢君之惡逢君之惡者未有不
能長君之惡長君之惡其罪小猶言齊桓公正而不
譎對下句言耳 逢君之惡所謂賊其君者也安得
不為諸侯之罪人

今之大夫今之諸侯之罪人也

五伯壞三王之法故為三王之罪人今之諸侯壞五伯之法故為五伯之罪人今之大夫賊其君故為其君之罪人 黃氏日抄曰五伯三王之罪人一章以至古之所謂民賊警切世變極為痛快自戰國風俗一變之後行於世者滔滔皆若人徒飾以三王以上之議論耳 林氏曰邵子有言治春秋者不先治五伯之功罪 云 孟子此章之義其亦若此也與 註蓋以五伯律今之諸侯則見其功以三王律五伯則見

其罪正與邵子之言合

魯欲使慎子為將軍章

慎子非史記所載慎到也到趙人學黃老之術嘗著書本傳不言其仕進慎子魯臣也名滑釐

殃民者不容於堯舜之世

減四字

輔氏似以為殃民之事堯舜所不容者非也者字分明作人說明其為堯舜罪人所以斥之也

一戰勝齊遂有南陽然且不可

芟一條

然且不可是言於理不可也此正是下文吾明告子

云之意新安以為就使克敵禍方深耳非也然且

不可下亦當足一句云況未必勝乎自天子之地

方千里至所益乎是然且不可之說主事而言故下

云當道自徒取諸彼以與此至況於殺人以求之乎

是殃民之說主心而言故下云志仁孟子此章之義

大旨如此

周公之封於魯

周公之封於魯為方百里也方止也謂止是百里而已地非不足也而儉於百里儉者王制所限不可越也

徒取諸彼以與此

芟一條

徒取諸彼以與此自慎子言也謂取齊與魯也

君子之事君也務引其君以當道志於仁而已

芟一條

或謂引君當道即是志於仁蓋未察孟子之意也如此朱子何乃謂事合於理心在於仁心事二字須分

明且以下章君不向道不志於仁照之尤信

今之事君者章

是富桀也桀不當富也是輔桀也桀不當輔也君不
向道不志仁只應引之以向道志仁而乃富之為之
強戰此其所以為民賊也 嚮道即當道也當道即
當敵之當亦向也朱子上章註曰當道謂事合於理
志仁謂心在於仁是兩平解也今此小註則曰不志
於仁所以釋不向道之實且曰上章務引其君以當

道志於仁而已亦言志仁之為當道耳此說未必與
集註合且上章集註既兩平解而此章又不復解安
知其不即是上章意邪

由今之道無變今之俗

芟三條

本文由字與變字主君言以此二等為良臣者今之
道今之俗也 今之所謂良臣欲藉以得天下也殊
不知若用此人雖與之以天下亦不能居然則為君
者乃反以為良臣而厚禮之不其謬哉

白圭曰吾欲二十而取一何如

白圭周人也當魏文侯時李克務盡地力而白圭樂
觀時變故人棄我取人取我與能薄飲食忍嗜欲與
用事僮僕同苦樂趨時若摯鳥猛獸之發故曰吾治
生猶孫吳用兵商鞅行法智不足以權變勇不足以
斷決仁不足以取予強不足以有守雖欲學吾術皆
不告之矣蓋天下言治生祖白圭白圭其有所試矣
能試其所長非苟而已也 白圭曰吾欲二十而取

一何如欲以其居積致富之術施之國家也孟子曰
子之道貉道也貉道安可得行於中國彼萬室之國
一人陶則可乎曰不可云曰請言貉道之所以不
可行於中國者夫貉五穀不生云

夫貉五穀不生一條

無城郭則無營築之費無宮室則無構造之費無宗
廟祭祀之禮則無犧牲粢盛酒醞之費無諸侯幣帛
饗殮則無朝會饋賜宴勞之費無百官有司則無食

祿之費故二十取一而足也 幣帛大抵凡綾羅絹
紬之類及銅錢貨物皆幣也故又謂之錢幣又曰公
卿議錢幣錢幣蓋通名帛只是其一端錢自太公九
府圜法便有 帛束帛也 今居中國去人倫無君
子而遺了城郭宮室此古人文章也 欲輕堯舜之
道一條可見孟子議論有歸宿處 什一而稅堯舜
之道也可見三代皆是因之 大貉小貉謂彼為大
貉此為小貉也大桀小桀亦然

白圭曰丹之治水也章

白圭所以自負其過禹者蓋其隄防一築而國遂不被其害無四乘之勞無八年之久故耶然其妄甚矣子過矣

不必謂子之言過矣只謂子過矣以其失言也下云吾子過矣亦以其言如此而責其過也

禹之治水水之道也

順字是朱子添助字只說水之道亦便見得是順水

之性 或以為性與道不同順其性即道也此說似善解剥但非虛心自然所見夫順其性者人又如何以人之道為水之道

是故禹以四海為壑

正是水之道處此禹以天下為度也今吾子以隣國為壑利己以害人也

水逆行謂之洚水

水逆行

云

所惡也今吾子以隣國為壑是壅水以

害人與洪水之災無異其亦不仁矣而乃誇以為愈於禹吾子過矣吾子過矣不必說為禹罪人只謂其言之過

君子不亮惡乎執

箋一條

亮者貞固也貞而不諒之諒只是固也 亮以心言心所以主乎其事者也君子不亮則做得亦罷不做亦罷且行且却乍作乍輟事不可立功不可成故曰惡乎執 孟子嘗謂大人言不必信而此乃教人執

諒何也蓋彼所謂信者不貞而固者也此所謂亮貞而固者也

魯欲使樂正子為政章

樂正子強乎即今所謂有力量也

好善足乎

言豈便足以治國耶

夫苟好善云告之以善

芟二條

由是以天下之善而理天下之事豈不綽綽有餘裕

哉而况魯國乎 吳仲珠謂苟好善則天下之凡有
強勇智慮多聞識者將皆來告之太求奇矣此三者
當世之所尚未聞其為孟子與樂正子之所尚也且
彼所謂強勇智慮多聞識自與孟子不同道

夫苟不好善

條

訑訑本不好善之人訑訑也予既已知之者人不樂
就之而云然也言其人訑訑然吾已知其為人矣就
之何為

陳子曰古之君子何如云所去三

陳子曰古之君子何如則仕孟子曰所就而仕者三
所去而不仕者亦有三

迎之致敬以有禮言將行其言也芟二條

此章所重在言將行其言也故以為見行可之仕而
先之以迎之致敬以有禮者序事之法先接見而後
及言議也言將行其言也其言行則其道行矣 迎
之致敬以有禮敬在心而禮其文也 迎之致敬迎

字迎接也非出迎也 言將行其言也將云者以其
未仕也故言就 凡言去者有就而後有去也故上
云將行其言下不云將只云言弗行也

其次雖未行其言也

條

公仰視蜚鴈而去言孔子既以禮貌衰而去則其初
之所以仕衛者決以迎之致敬有禮也故曰所謂際
可之仕若孔子於衛靈公是也

其下朝不食夕不食

斐一條

朝不食夕不食飢餓不能出門戶是何故有此窮困
蓋為其君不我以耳所謂孔子之厄於陳蔡之間無
上下之交正為此也以此觀之可見雲峯所謂欲去
而不能去者為得其實矣故下文曰君聞之曰吾大
者不能行其道又不能從其言行其道與從其言不
同如彼之道明德也吾行其明德之道如彼之道新
民也吾行其新民之道彼以堯舜之道望我吾行堯
舜之道也彼以湯武之事望我吾行湯武之事也此

是行其道若從其言只是為他因事納誨如有所諫
諍之類與上文言將行其言也言字不同彼即是行
其道也觀本文大者及又字最分明 此末一段只
言就若不如是則不就而去在其中矣然亦只是暫
時之就終須去耳 所謂公養之仕斷是位卑祿薄
抱關擊柝者何則其君大者不能行其道其次不能
從其言至使飢餓於其土地欲去而不得去則非為
貧而仕而何哉此所當辨 大註然未至飢餓不能

出門戶則猶不受也是一意其曰免死而已則其所受亦有節矣又是一意言不至於甚窮亦不受然雖受亦不多受也 朱子小註曰其上以言之行不行為去就此仕之正也其次以禮貌未衰為去就又其次至於不得已而受其賜則豈君子之本心哉蓋當是時舉天下莫能行吾言矣則雖有能接我以禮貌而周我之困窮者豈不善於彼哉是以君子以為猶可就也

舜發於畎畝之中章

按前篇謂微子微仲王子比干箕子膠鬲皆賢人也
相與輔相之則膠鬲為紂之臣矣今註曰膠鬲遭亂
鬻販魚鹽文王舉之則又似一人從側微而起者豈
紂無道棄賢或賢者自去之膠鬲於是乎復隱處鬻
販而文王舉用之耶或曰彼既為紂所任雖去何
能俛首鬻販間耶蓋二人也曰范蠡曾為越臣矣終
去之五湖而為大賈稱鴟夷子皮又按國語曰膠鬲

與妲己比而亡商則本是一人先事紂後事周亦如
伊尹之就桀就湯也國語註曰膠鬲殷賢臣自殷適
周佐武王以亡殷則實一人也國語之言未必可信
而其為一人則可知

故天將降大任於是人也一條

此條總是言雖上智之人於天下之事一一經涉過
方得若身處順境則無由經涉天下許多事務曲折
而所就亦少矣故引程子曰若要熟也須從這裏過

今讀者多欠體貼若要熟熟字謂義理自家相便習也潛室陳氏註可取 餓其體膚不言餓其腑臟而云體膚者人受餓則體膚消削其歸固在體膚也

空乏其身總括上苦勞餓三句再說無去處了且身字實包得心志筋骨體膚若以窮瘁不遂解又犯了下句行拂亂其所為故定從包上三句為是 動心忍性成其德也增益其所不能成其材也或謂只動心忍性便是增益不能則欠了才一脚未週也 然

所謂性亦指氣稟食色而言耳註與下篇口之於味也四肢之於安逸也性也同然雖指氣稟食色言終不與告子同告子指氣稟食色即是性孟子此言即指其氣稟食色之性也性在氣稟中有昏明厚薄之不同以食色言有輕者有重者此便係於氣稟也氣稟食色是兩件如子路之勇子張之辟是氣稟之性宣王之好貨好色之類是食色之性若要熟也須從這裏過者蓋此數人者雖皆上智之資然其得

於世故之閱歷世味之脩嘗者至多若以其天資之美則猶未足以勝大任也

人恒過然後能改

人恒過即下文註所謂不能謹於平日不能燭於幾微也困心衡慮而後作者其改過得之已微色發聲而後喻者其改過得之人

入則無法家拂士

法家之法字與法語之言法字同如漢之汲黯吳之

張昭唐之魏徵宋璟其庶幾乎世臣二字就法家二字出楊震四世五公皆正人也其法家乎乃人君所嚴憚者拂士只是輔弼左右之士比法家略次法家是世臣拂士是方仕者有親疎尊卑之辨敵國外患也須做兩般看如魯有武仲之據防楚有伍子胥之在吳非敵國乃外患也

然後知生於憂患而死於安樂也

生死二字活看如國亡身危而名辱雖不死亦死道

也若舜發於畎畝傳說舉於版築則自憂患而得生
道矣大註以全字貼生字亡字貼死字尤有意不
可如新安陳氏所分貼蓋生於憂患死於安樂之意
遂節都有當味入則無法家拂士一節大註云此言
國亦然也則以專為死於安樂者非矣

孟子曰教亦多術矣章

予不屑之教誨者不教之教也

四書蒙引卷十四